

Aenmauh Ngoenzlaeng

□ 贵港市覃塘区蒙公乡高占小学三年级 Liengz Cwngzyez/梁城烨


Miz ngoenz ndeu, danghnaeuz mwngz fatyienh youq seiqlengq gyoengq daxgoeng daxbuz gwnz gyaeuj cungj daenj aenmauh maj rim dujva moqset seiz, mwngz cienfanh gaej raen geizgvaiq, gijhaenx dwg gou cienmonz vih gyoengq daxgoeng daxbuz guh “aenmauh hoengheiq moqseuq”.

Aenmauh dwg aeu caizliuh gig mbaeu gig mbaeu daeuj guh baenz, yienghneix daenj hwnjdaeu gawq mbaeumbimbi youh cwxcaih raixcaix. Aenmauh faen miz sam caengz, caengz ceiq baihlaj caeuq aenmauh itbuen ityiengh, ndaej daenj gwnz gyaeuj bae, caengz cungqgyang ancang miz aen

fanhnwngz gaepsouheiq, de ndaej supsou gij heiqfeiq, namhfoenx caeuq cabyaem, lij ndaej bienqvaq baenz yingzyangj hawj doenghgo majhung. Caengz ceiq gwnz couh lumj aen vabuenz ndeu, youq ndaw de ndaej ndaem gova mwngz siengj ndaem haenx. Ndaw mauh lij ancang miz cungj ganjyngmok saenzgeiz ndeu, moix baez gyoengq daxgoeng daxbuz daenj hwnj cungj mauh neix seiz, ganjyngmok baez bungz daengz byoemgyaeuj roxnaeuz naenggyaeuj seiz, couh lumj haigven ityiengh hai fanhnwngz gaepsouheiq ndaw daihngeih caengz, ndigah, mboujlwnh

gyoengq daxgoeng daxbuz byaij daengz gizlawz, gyoengqde hoengheiq seiqlengq cungj ndaej bienqbaenz moqset seuqcingh, gwnz dingjgyaeuj dujva hix fatok heiq homfifi, geijlai cwxcaih ha! Dang aenmauh duet roengzdaeuj seiz, gij yingzyangj ndaw aenmauh lij laebdaeb ndaej hawj dujva maj dem.

Gyoengq baengzyoux, baenzlawz yiengh? Vaiq di daeuj bang daxgoeng daxbuz mwngz cawx aenmauh dingjgyaeuj maj miz dujva moqset ba! Roxnaeuz mwngz cam: “Gijmaz? Bae gizlawz cawx cungj mauh neix?” Hehe, dangyienz dwg daeuj ra gou la!



Neix couh dwg aenmauh ngoenzlaeng.

(lauxsae son'gyauq Cinz Cinhdonz/覃珍团)

Ndoeng Goraeunding Gyaeundei Yinxvunz

Seizdoeng, aen geiqciet nitsisi ndeu, rumzbaek cifofo, dauq miz cungj doenghgo ndeu laeglemx didmaj. De, couh dwg go faexraeu daengjgywdgywd haenx, de mbouj lau nit, yied nit yied daengjsih. “Mbawnae hoeng gvaq va ngeih nyied”, boux sij sei Dangzdai Lij Muz coenz sei cienzdanq baenz cien bi neix, couh dwg danqhaenh gij cingsaenz faexraeu.

Gij faexraeu Gvangjsih Dwzbauj did baenz ndoi baenz rungh, gyae'gyae muengh bae, mdawraeu lumjbaenz ndaem youq gwnz bya nei.

Rumzbaek, daihdangq dawz deuz gij raeujrub seizcin, dauq fouzfap dawz deuz gij ndatcingz lumj feiz faexraeu, gij mbawraeu lumjbaenz naeuz: “Rumzbaek, mwngz ci ba, mwngz ning mbouj dawz mbawraeu!” Gangj sat, mbawraeu baez saenq ndang, doek roengz geij mbaw faexraeu hoengzfifi, lumjbaenz yienjbaij: “Mwngz yawj, gij mbaw gou hoengz lumj lwgfeiz ne, geijlai gyaeu ho!” Dahraix, gij mbawraeu lumj feiz hoengzfodfod haenx doxcomz youq itheij, aenbya, deng gij mbawraeu deihdindin haenx cimq youq baihdaw, lumj coemh feizfoengx, hawj vunz nyaenx mbouj ndaej dingz din ngonzyawj.

Lij miz gij gyaeundei hawj vunz doenghsim haenx, couh dwg mienh raemxhuz caemrikrik lajdin neix, yawj gij mbawraeu hoengz lumj feiz haenx, gou lumjbaenz hix bienq baenz mbaw faexraeu ndeu, dem gij mbawraeu itheij guhcaemz guh'angq, doek youq gwnz mienhhuz lumj aengingq haenx, baenz raq baenz raq rumz ci gvaqdaeuj, gou fouzfetfet youq gwnz mienhhuz lumj aengingq neix, couh raen raemxlangh baenz gyongx baenz gyongx fubfub fedfed, mumjumj gymqgyumq ingcicik gij ngauez lumj feiz gou……

Faexraeu, gyaeu dwk baenzneix oksaek, gou gingqcungh gij cingsaenz mwngz!

(Vangz Swhyiz raiz Goengen hoiz)



Lwgvuengziq

bouxraiz Swng'aihgwzshbeilij bouxhoiz Luz Fwncangz

□ 圣埃克苏佩里 著 卢奋长 译

“Caj mwngz mbouj simcaep le (seizgan rox yw ndei simcaep), mwngz cix rox aenvih roxnaj gou le sim'angq. Mwngz ciengxlwenx dwg baengzyoux gou. Mwngz yaek caeuq gou caemh riu caemh angq. Mbangjseiz, mwngz vih le angqfaengz simhai, cix rox ciengzseiz hai bakcueng bae. Gyoengq baengzyoux mwngz raen mwngz ngiengx gyaeuj cim gwnzmbwn riuhehe, gyoengqde cix raen geizheih dahraix. Daengz seizde, mwngz couh ndaej naeuz gyoengqde nyi: ‘Wgo! Ndaundeiq baezbaez cungj hawj gou riuhehe go!’ Gyoengqde couh laihnaeuz mwngz baenzbag baenzmbaj liux. Gaiqneix dwg gou loengh bajheiq hawj mwngz yakyawj……”

De riuhehe baezmoq.

“Cix lumjnaeuz gou mbouj dwg soengq ndaundeiq hawj mwngz, dwg soengq lailai aen lingz rox riu hawj mwngz.”

De lij riuhehe dem. Gvaq yaep ndeu youh mbouj riu lo, baetmaed dwk naeuz:

“Haemhneix …… mwngz gaej daeuj gizneix lo……”

“Gou mbouj lizhai mwngz.” Gou han de naeuz.

“Gou yawj hwnjdaeu youqyak lai, guhlumj yaek dai liux. Mwngz gaej daeuj yawj gijneix, mbouj miz gijmaz baenzyawj ne……”

“Gou mbouj lizhai mwngz.” Gou han de naeuz.

De youheiq dangqmaz.

“Gou lwnh gijneix hawj mwngz nyi, dwg aenvih duzngwz. Mwngz gaej hawj duzngwz haeb deng bw, duzngwz yakdoeg lai, luenh haeb vunz……”

“Gou mbouj lizhai mwngz.” Gou han de naeuz.

Seizeix de couh lumjbaenz mizdi hoznet lo:

“Duzngwz haeb mbat daihngeih cix mbouj miz doeg lo.”

Haemhde, gou mbouj raen de couh gag deuz lo. De laeglemx deuz lo. Caj gou gyaiq hwnj de, de dingj byaij riuuzriuz doxbae. Gag naeuz ndwi:

“O, mwngz riengz laeng daeuj lega……”

De gaem fwngz gou maenhdekdek, youheiq dangqmaz.



“Mwngz gaej daeuj lij lai ndei gvaq, mwngz daeuj le couh rox doeknaiq lo. Gou yawj hwnjdaeu lumj yaek dai yienghde, hoeng gou mbouj dwg dai dahraix go……”

(40)